

Neach-caraidh is glèidhidh



Fios mun Dreuchd

www.smo.uhi.ac.uk

Tha Sabhal Mòr Ostaig na charthannas clàraichte an Alba SC002

A charaid/A bhanacharaid

Tha sinn fìor thoilichte gu bheil sibh air ùidh a nochdadh ann an dreuchd Neach-caraidh aig an t-Sabhal.

Anns a' phasgan seo, thathas air beagan fiosrachaidh a tharraing ri chèile airson blasad a thoirt dhuibh air na bhios a' dol aig a' Cholaiste agus air an t-seòrsa àrainneachd-obrach a tha againn. Tha 101 neach-obrach sa Cholaiste (cuid aig astar) agus tha eachdraidh làidir againn a bhith ag obair mar sgioba le dàimhean làidir agus feallsanachd co-obrachail. Seo mar a tha am fiosrachadh air a roinn dhuibh:

Cùrsaichean is Oileanaich
Roinnean na Colaiste
Fiosrachadh Feumail Eile
Tuairisgeul obrach
Sònrachadh Pearsa
Cumhachan Obrach
Fios mu Iarrtas

Tha sinn an dòchas gun còrd na leanas ribh agus gum bi sibh airson ur n-iarrtas a thoirt air adhart chun na h-ath ìre. Ma tha ceistean sam bith agaibh no ma tha am barrachd fiosrachaidh a dhìth oirbh faodar fònadh thugainn aig àm sam bith.

Le deagh dùrachdan

Nicole NicThòmais

Ceannard Sgiobachd
01471 888 301 nnt.smo@uhi.ac.uk

Tha àrainn oideachaidh air leth aig Sabhal Mòr Ostaig. Tha na cùrsaichean agus a' Cholaiste gu lèir tro mheadhan na Gàidhlig - an aon Cholaiste den t-seòrsa seo an Alba agus san t-saoghal. Tha a' Cholaiste stèidhichte ann an Slèite anns an Eilean Sgitheanach, sgìre a tha ainmeil airson bòidhchead na h-àrainneachd.

Chaidh a' Cholaiste a stèidheachadh ann an 1973 agus bhon uair sin tha i air cliù a chosnadh air feadh an t-saoghail mar Ionad airson Cànan agus Cultar na Gàidhlig. 'S e colaiste spèisealta a th' innte, a' tabhann foghlam àrd-ìre, foghlam leantainneach agus cothroman rannsachaidh. Tha Sabhal Mòr Ostaig mothachail air cho cudromach 's a tha bunait làidir airson a' chàinain, a' chultair agus nan ealan agus tha i an sàs ann an iomadh pròiseact gus seo a thoirt air adhart.

“Far am faigh a h-uile neach

cothrom pàirt a ghabhail ann

an leasachadh na Gàidhlig”

Amas na Colaiste

Tha Sabhal Mòr Ostaig airson a bhith na shàr ionad acadaimigeach aig cridhe leasachaidhean ann an cànan agus dualchas nan Gàidheal le bhith a' tairgsinn deagh chothroman foghlaim, trèanaidh agus rannsachaidh tro mheadhan na Gàidhlig agus le bhith a' dol an sàs gu h-innleachdach còmhla ri daoine eile, luchd-gnìomhachais agus a' choimhearsnachd air fad gus leasachaidhean sòisealta, dualchasach agus eaconamach a chur air adhart. Tha a' Cholaiste na h-àite foghlaim làn-Ghàidhlig agus na h-àite gnìomhachais làn-Ghàidhlig, le sàbhaladh, brosnachadh agus leudachadh na Gàidhlig mar phrìomh adhbhar na Colaiste.

Luachan na Colaiste – Ro-innleachd SMO

A' brosnachadh Co-ionannachd

Tha co-ionannachd aig cridhe obair na Colaiste anns a h-uile dòigh.

Miann

A' togail air soirbheachas mar Ionad Nàiseanta Cànan is Cultar na Gàidhlig gus coimhearsnachd na Gàidhlig a mhisneachadh agus a neartachadh.

A' Ghàidhlig

Tha an cànan aig cridhe obair na Colaiste agus tha sinn a' dèanamh a h-uile oidhirp airson a neartachadh agus a leasachadh anns gach raon de ar n-obair.

Sàr-ionad

Tha a' Cholaiste stèidhichte airson a bhith na shàr-ionad foghlaim, rannsachaidh agus leasachaidh, ag obair còmhla ri ar coimhearsnachdan is com-pàirtichean ionadail, nàiseanta agus eadar-

nàiseanta. Tha e mar amas dhuinn taic a chur ri ar n-oileanaich agus ri ar luchd-obrach a chum maith am beatha.

Aig cridhe na Coimhearsnachd

Tha Sabhal Mòr Ostaig aig cridhe coimhearsnachd na Gàidhlig, aig ìre ionadail, nàiseanta agus eadar- nàiseanta.

Daoine

'S iad ar daoine - luchd-obrach, oileanaich, buill ar coimhearsnachd agus ar luchd-ceuma a tha sgapte air feadh an t-saoghail, an neart as motha a th' againn. Bidh sinn ag obrachadh gu dlùth còmhla riutha gus an Ro-innleachd seo a thoirt gu buil.

Fosgailte agus Onarach

Tha soirbheachas na Colaiste an crochadh gu mòr air a bhith a' dèiligeadh ri daoine gu h-onarach agus gu fosgailte agus a bhith dìreach nar cuid conaltraidh ris gach neach leis a bheil sinn ag obrachadh.

Ùr-ghnàthach

Tha a' Cholaiste air cliù a chosnadh dhi fhèin mar shàr-ionad ùr-ghnàthach aig cridhe leasachadh na Gàidhlig.

A' Cur ri luach eaconamach agus sòisealta

Tha buaidh mhòr aig obair an t-Sabhail Mhòir air eaconamaidh agus coimhearsnachd na Gàidhlig agus tha a' Cholaiste a' creidsinn gu mòr ann a bhith a' sgaoileadh nam buannachdan sin a tha i a' cruthachadh gu maith ar coimhearsnachdan air fad.

Ar Sealladh

Bidh Sabhal Mòr Ostaig mar:

Shàr ionad nàiseanta is eadar-nàiseanta airson na Gàidhlig

Shàr ionad foghlaim is rannsachaidh

Shàr ionad dha na Meadhanan is na h-Ealain Ghàidhlig

Phrìomh ionad ionnsachaidh na Gàidhlig

Shàr ionad cleachdaidh na Gàidhlig

Phrìomh àite-obrach na Gàidhlig

Làn chom-pàirtiche ann an libhrigeadh Plana Nàiseanta na Gàidhlig

Cùrsaichean is Oileanaich

'S e colaiste ùr-ghnàthach a th' ann an Sabhal Mòr Ostaig agus tha i na com-pàirtiche acadaimigeach ann an Oilthigh na Gàidhealtachd 's nan Eilean. Tha goireasan ionnsachaidh air leth ann, leabharlann sònraichte, spèisealta, agus tha àiteachan-fuirich agus ionad cùraim chloinne air an àrainn.

Tha sinn dìreach air fàilte a chur air oileanaich ùr àrd-ìre bliadhna acadaimigich 2020/21, le cuid air an làraich agus cuid a' leantainn aig astar. Tha còrr is 300 oileanaich astar againn cuideachd eadar An Cùrsa Inntigidh agus An Cùrsa Adhartais, sin an àireamh as motha gu ruige seo. Tron ùine fo ghlais, ghluais sinn na Cùrsaichean Goirid air loidhne is fhuair 440 neach taic, teagasg agus oideachadh sa Ghàidhlig agus ann an ceòl, seinn is cultar na Gàidhlig, tro mhìosan an t-samhraidh. 'S ann às Alba agus an Rìoghachd Aonaichte a bhios a' mhòr-chuid ach tha oileanaich air tighinn thugainn às na Stàitean Aonaichte, dùthchannan Eòrpach agus Àisia cuideachd. Tha e àbhaisteach gum bi co-dhiù ficheà dùthaich air a riochdachadh am measg oileanaich an t-Sabhail, sa bhliadhna.

Tha luchd-ceumnachaidh an t-Sabhail air a dhol air adhart gu dreuchdan Gàidhlig ann an iomadach gnìomhachas, a' cur an sgilean gu feum ann an leasachadh a' chànain. Tha còrr is 1,000 ceumnaiche air tighinn tro dhorsan na Colaiste, bhon a thòisich na cùrsaichean àrd-ìre ann an 1985.

Foghlam Leantainneach

Cùrsaichean Goirid - Gàidhlig - gach ìre
Cùrsaichean Goirid - Ceòl - measgachadh
An Cùrsa Inntigidh - do luchd-tòiseachaidh air astar
FA Clann agus Daoine Òga (sgoilearan S5 agus S6)
FA Na Meadhanan Didseatach agus Cruthachail (sgoilearan S5 agus S6)

Teisteanasan Foghlam Ard ìre

An Cùrsa Adhartais - do luchd eadar-mheadhanach air astar
An Cùrsa Comais - do luchd eadar-mheadhanach (làrach)
Gàidhlig is Conaltradh - bliadhna cànan do dh'fhileantaich (làrach)

Ceumannan

BA (Urr) Gàidhlig is Leasachadh
BA (Urr) Gàidhlig is Ceòl Traidiseanta
BA (Urr) Gàidhlig is na Meadhanan
BA (Urr) Gàidhlig is Foghlam (teisteanas teagaisg na lùib) BA (Urr) Cànan is Cultar na Gàidhlig
Diplòma anns na Meadhanan Gàidhlig

For-cheumannan

MSc Gàidhlig is Eachdraidh na Gàidhealtachd
Modal ann an Sgilean Deasachaidh
Sgilean Eadar-theangachaidh (ga dhearbhadh) PG Cert Cultar agus Dualchas na h-Alba (astar)
PGDE Gàidhlig (àrd-sgoil) agus STREAP - do thidsearan
PDA Eadar-theangachadh (ri dhearbhadh) agus Cothroman MLitt, MRanns agus

'S e stèidheachd ionnsachaidh bheothail, adhartach a th' ann an Sabhal Mòr Ostaig, a bhios ag amas air coimhearsnachd Ghàidhlig làn mhisneachd is soirbheachais a bhrosnachadh. Tha iomadh pròiseact agus buidheann stèidhichte air làrach na Colaiste (faicibh an liosta gu h-ìosal), agus iomadh tachartas ionadail air an cumail ann cuideachd.

Tha iomadh togalach againn air an làraich agus bidh buidhnean is pròiseactan stèidhichte againn a' dearbhadh cho cudromach 's a tha com-pàirteachas ann an saoghal na Gàidhlig agus mar a tha a' Cholaiste cuideachd a' cumail taic ri gnìomhachasan anns an sgìre fhèin.

Pròiseactan (far a bheil com-pàirt aig a' Cholaiste)

SOILLSE

Faclair na Gàidhlig

Ainmean Àite na h-Alba

Tobar an Dualchais

Companaidhean agus Buidhnean leis a' Cholaiste

Fàs Mòr - ionad cùraim chloinne

Cànan (CGS) - Companaidh ioma-mheadhan na Colaiste

SkyeSpace - stiùidio agus goireasan clàraidh

Luchd-màil nan Oifisean

Dualchas - ailtirean

Seumas Ó Baoighille Ltd - gnìomhachas ionadail

DEARG - Bùth ghibhtean

SEALL – companaidh ealain ionadail

Sealladh - companaidh riochdachaidh telebhisein

Young Films – companaidh film

TIOTAL-OBACH	Neach-càraidh is Glèidhidh
ROINN	Na h-Oighreachd is Seirbheisean
AN URRA RI	A' Phrìomh Neach-glèidhidh
TUARASTAIL	£17,000
PRÌOMH ÀITE-OBACH	Sabhal Mòr Ostaig, An Teanga, An t-Eilean Sgitheanach, IV44 8RQ

PRÌOMH AMAS NA H-OBACH

'S iad prìomh amasan na h-obrach, fo stiùireadh a' Phrìomh Neach-gleidhidh, a bhith a' cumail structar, seirbheis agus stuthan nan togalaichean aig àrd ìre. Bithear cuideachd a' coimhead às dèidh nan làraich agus nan raointean-parcaidh agus gan cumail ann an deagh staid. Feumar na dleastanasan seo an coileanadh a-rèir poileasaidhean, riaghailtean is àrainn Sabhal Mòr Ostaig, far a bheilear a' neartachadh is a' brosnachadh na Gàidhlig.

PRÌOMH UALLAICHEAN

- Dleastanasan gleidhidh àbhaisteach a ghabhail os làimh a leithid ag atharrachadh solais, obair saoirsneachd, obair peantaidh, a' cur ghlasan ùra air dorsan agus dleastanasan co-cheangailte ri sàbhailteachd
- A' dèiligeadh ri suidheachaidhean èiginneach mar a nochdas bho àm gu àm, m.e. leis an siostam glac-teine a' dol dheth; taic Ciad Cobhair a chumail ri oileanaich, luchd-obrach is luchd-tadhail
- A' gabhail os làimh dleastanasan eile mar a bhios a dhìth air a' cholaiste is mar a thèid iarraidh oirbh le Manaidsear na h-Aoigheachd, no Ceannard na h-Oighreachd is Seirbheisean
- A' cumail smachd air siostaman teasachaidh is rabhaidh teine na Colaiste agus a' cumail taic ri Ceannard na h-Oighreachd is Seirbheisean le obair càraidh, leasachaidh is trèanadh mar a bhios a dhìth orra
- A' cur air dòigh seòmraichean coinneimh, mar eisimpleir a' gluasad àirneis agus gan sgioblachadh as dèidh làimh
- A' togail agus a' sgaoileadh post taobh a-staigh na Colaiste agus a' dol gu Oifis a' Phuist le post taobh a-muigh na Colaiste
- A' gearradh an fheòir agus a' cumail nan gàraidhean sgiobalta
- A' dèiligeadh ri duilgheadasan a thaobh deigh agus sneachd m.e. sàbhailteachd air na raointean parcaidh agus rathaidean na Colaiste.
- A' cumail carbadan na Colaiste ann an deagh staid agus a rèir nan laghan iomchaidh
- A' cur fios air stoc agus a' cumail nan stòran agaibh sgiobalta
- A' conaltradh ri luchd-obrach, luchd-ceannachd, oileanaich agus luchd-tadhail mar a bhios iomchaidh
- Bho àm gu àm a bhith a' fuireach anns na togalaichean caidil nuair a bhios an Neach-faire tron oidhche air saor-làithean
- A' frithealadh chùrsaichean trèanadh mar a thèid iarraidh oirbh
- Aodach-obrach a chosg a dh'obair



SABHAL

MÒR OSTAIG

Ionad Nàiseanta Cànan is Cultar na Gàidhlig

- A' cumail ri poileasaidhean is modhan-obrach na Colaiste

- A' dèanamh cinnteach gu bheil an t-àite-obrach agaibh glan, sgiobalta agus gu bheil sibh a' cumail ri riaghailtean slàinte is sàbhailteachd.

- **Co-obrachadh**

- Ag obair ann an com-pàirteachas leis an sgioba gleidhidh agus leis an Dorsair fo stiùir a' Phrìomh Neach-gleidhidh, agus leis na sgiobaidhean aoigheachd is sheirbheisean oileanach, a' cur bhrathan an sàs no a' freagairt riutha airson dèiligeadh le tachartasan air an làraich
- A' conaltradh ri luchd-obrach, luchd-ceannachd, oileanaich is luchd-tadhail mar a bhios iomchaidh
- Deagh-ghnè na Colaiste a choileanadh agus a leasachadh
- A' leigeil fios don Phrìomh Neach-gleidhidh mu rud sam bith a tha briste, cunnartach no a chaidh a ghoid

- **Slàinte is Sàbhailteachd**

- Sùil a chumail ri ur sàbhailteachd fhèin agus sàbhailteachd dhaoine eile
- A bhith a' frithealadh cothroman trèanaidh ann an ciad chobhair a chuireas a' Cholaiste air dòigh a rèir na h-iomairt *Beatha Shlàn na h-Obrach* airson sàbhailteachd a cuid oileanach, luchd-obrach is aoighean agus a' cur brath chun nan seirbheisean èiginn mar as iomchaidh
- A' dèanamh cinnteach, an luib an neach-faire tron oidhche, gu bheil na togalaichean glaiste agus tèarainte aig na h-amannan iomchaidh
- A' cuideachadh le cur an gnìomh poileasaidhean slàinte is sàbhailteachd na Colaiste
- A' cumail smachd air na h-innealan agus na siostaman ath-cleachdaidh

Sònrachadh Pearsa

Feumaidh sibh a bhith 21 bliadhna a dh'aois no nas sine (air sàilleibh riaghailtean draibhidh a' meanbh-bhus) agus cead draibhidh a bhith agaibh

Sgilean Riatanach:

Comas obrachadh leibh fhèin

Comas obrachadh ann an sgioba

Comas labhairt sa Ghàidhlig agus sgilean conaltraidh math

Comas obrachadh ri ceann-ùine

Comas iomadach rud a dhèanamh aig an aon àm

Sgilean practaigeach, m.e. comasach air uidheamachd a chàradh agus air peantadh

Sgilean coimpiutaireachd, m.e. Word, Excel, post-d

Sgilean Feumail:

Eòlas air an obair seo

Sgilean co-cheangailte ri obair togail

Sgilean co-cheangailte ri bhith a' sgioblachadh nan gàraidhean (landscaping)

Fiosrachadh Cudromach Eile:

Bithear ag obair 35 uairean san t-seachdain, sa chumantas eadar 8.00 is 4.00f no 9.00m is 5.00f, 5 latha à 7

Gheibhear 35 saor-làithean sa bhliadhna a' ruith bho 1 Faoilleach – 31 Dùbhlachd

Ann a bhith a' cuideachadh luchd-obrach le an cuid leasachaidh phearsanta, comasan obrach agus feumalachdan trèanaidh, gheibhear measadh obrach gach bliadhna le ur Manaidsear.

Feumar seiseanan trèanaidh riatanach a fhrithealadh agus coinneamhan mar a bhios iomchaidh. Gheibhear fiosrachadh ron àm.

Tha Sabhal Mòr Ostaig làn taiceil a thaobh leasachadh na Gàidhlig agus gheibhear a h-uile cothrom ur cuid comasan cànan a leasachadh

Tha sgeama pheinnsein aig a' Cholaiste

Mus tèid ur fastadh bith agaibh ri dhol tro sgrùdadh Protecting Vulnerable Groups (PVG) agus thèid iarraidh air teisteanasan

Fios mu Iarrtasan

Co-ionannachd Chothroman

Tha co-ionannachd chothroman aig cridhe Shabhal Mòr Ostaig.

Tillibh litir agus foirm-iarrtais air post-d gu: obair@smo.uhi.ac.uk

Ceann-là: 5f 17mh an t-Sultain 2020

Agallamhan: Diardaoin 24 an t-Sultain 2020

Thèid agallamhan a chumail tro Zoom.

Faodar còmhradh neo-fhoirmeil a chumail le Dòmhnall Angaidh MacIlinnein air 01471 888 325 no post-d: dam.smo@uhi.ac.uk no le Nicola NicThòmais, Stiùiriche Corporra 01471 888 301 post-d nnt.smo@ui.ac.uk